



## Pfluderi - Asyl (Pfluderi - Alti Garde)

# 's Zermatter Rummelhorn

Hailige Bimbam nundefahne  
wo fiehrt die Feschtlisucht no ane  
guet, s'isch e Laischtig gsi, dasch woher  
und bsunders no vor hundert Jahr  
wo ein vo Aengland, so-ne Junge  
s'erscht mool het s'Matterhorn bezwunge  
doch heisst das nit, dass mir hyt miesse  
eine hinter d'Bindi giessi  
me ka im Wimper viel meh schängge  
wenn me schlicht duet an ihn dängge  
doch sag das imme Aidgenoss  
dä stiggt nit ab sim hoche Ross  
uns Schwizer liggt's emool im Bluet  
ass me Feschтли baue duct.

Drum find'sch au am Zermatter-Bärg  
d'Feschtbrieder intensiv am Würgg  
näbscht Rede, Frässe und viel Suffe  
isch's Matterhorn Ameisehuffe  
Aengländer, Schwizer, Russe, Schwobe  
gsehn sich scho uff em Gipfel obe  
National- und Bundesreet  
finde au es miech sich bleed  
wenn dat in dr Zyttig stoh  
si syge nit ganz uffe ko  
e Masseb'stygig will me starte  
doch alli wo do druff dien warte  
hänn pletzlich eine in de Hose  
well's duet Wolgge anebloose  
nur erfahrene Alpinische  
kenne sich zum Uffstyg rischte

die andere mien unde bibe  
und sich mit Feschte d'Zyt vertrybe  
es heisst halt nonig «darf i bitte —  
zwaimool aifach Hernlihytte»  
das glaubsch doch, s'Matterhorn bestyge  
isch meh als Damefyrzli byge.

Au s'Färnsch het im Wallis unde  
e ganz manierlig Frässe gfunde  
die ganzi Färnschprominanz  
macht mit bi däne Fyrlifänz  
zämme mit dr Bi-Bi-Ci  
dräffe si im Wallis y  
si mechte die Bestygig sände  
und hoffe dodurch s'Blettli z'wände  
damit dr Doggter Guido Frei  
meh Stoff het fir si Plauderei  
als Färnschstar und Gagesträber  
reportiert dr Männi Wäber  
wie gwehnlig duet er yberdribe  
fir's Bi-Bi-Ci isch nit meh blybe  
drum seit em denn au d'Hausener Lilo  
waisch Männi, das hät'sch derfe si-lo  
das gseht, y hoff du lehrsch do drus  
nach Werner-Vetterli-Wirtschaft us.

Doch s'Horn bringt niemer uss dr Rueh  
es schittlet nur dr Kopf derzue  
und dänggt, was sin doch das fir Zwärge  
im Gägesatz zue unsere Bärge  
wenn si nur wurde uff mi loose  
denn wisse si, ass mer kenne bloose  
scho mängge isch uff dr Gipfel ko  
und het sich denn sälber am Seil abe-gloh  
jetz macht me mit mir so fuule Zauber  
y stand halt im Brennpunkt vom Hans O. Stauber  
noh mir wärde Neyi uff d'Rolle gnoh  
und vor mir isch's andere gange e-so  
wenn y bispielswys an d'Jungfrau dängg  
die hett jo gopfriedstutz au's Gschängg  
was het me mit ihre nit alles scho trybe  
— und trotzdem isch si Jungfrau blybe.

---

Noh ebbis!

Wär's gnau will wisse, goht am Zyschtig an d'Ladärne-  
Usstellig. Si isch offe vom Morge am nyini bis Zobe am elfi.

---